

# Ang Asoy ni Amanda Smith sa Hawn's Mill



Sa Oktubre 30, 1838, giatake sa manggugubot nga grupo ang pamuluy-anan sa Santos sa Ulahing mga Adlaw nga nailhang Hawn's Mill. Gipusil sa manggugubot nga grupo ang mga lalaki ug mga bata nga lalaki nga misulod sa pandayan aron motago ug depensahan ang ilang katawhan. Desisiyete ka Santos sa Ulahing mga Adlaw ang napatay sa pag-atake, ug kapin sa dosena ang nasamdan.

Apil sa nasamdan ang sayis anyos nga si Alma Smith, nga nawala ang tibuok lutahan sa bat-ang human siya napusilan. Nabalaka kaayo ang inahan ni Alma nga si Amanda Barnes Smith dihang nakit-an niya siya. Nagbangutan usab siya pag-ayo tungod sa kamatayon sa iyang bana ug 10 anyos nga anak nga lalaki tungod sa pag-atake.

Kay wala may laing makatabang niya, gitapok ni Amanda ang nahibilin pa niyang mga anak ug nag-ampo alang sa giya. Siya miampo, "O, akong Langitnong Amahan, Imong nakita ang akong makaluluoy nga batang samaran ug nasayod sa akong kawalay kasinatian. O, Langitnong Amahan, tudloi ako unsay buhaton."

Samtang nahuman na og ampo si Amanda, nakadungog siyag tingog nga nagtudlo niyang sagulan og tubig ang abo. Gigamit niya ang solusyon aron hugasan ang samad ni Alma hangtod nga malimpyo kini. Dayon, giaghat si Amanda nga magkuhag gamot sa kahoy nga elm ug gidugmok kini. Gibutang niya ang dinugmok nga gamot sa samad ni Alma ug giputos kini og panapton.

"Karon hgda sama ana, ug ayaw paglihok," giingnan niya ang iyang anak, "ug himoan ka sa Ginoo og bag-ong bat-ang."

Ang samad ni Alma nakapugong kang Amanda ug sa iyang pamilya sa pagbakwit human sa pag-ataki. Paglabay sa mga semana, ang manggugubot nga grupo naghatag og tagal alang niya ug sa uban nga nahibiling mga Santos sa pagpahawa. Nagkadako ang kahadlok ni Amanda samtang nagkaduol ang tagal. Mitago siya sa gibugkos nga mga punoan sa mais aron makaampo og kusog nga dili madunggan. Dayon nakadungog siyag tingog nga gibalikbalik kining mga pulonga:

*Kalag nga diha kang Jesus misalig,*

*Dili ako sa kaaway pakabig;*

*Kalag nga sa impyerno gitinguha,*

*Ako dili, dili gayud, mobiya!*

Kining mga pulonga gikan sa himno nga "Unsa Kalig-on ang Tukuranan" (*Mga Himno*, num. 44) nakatabang kang Alma nga mobatig kalig-on ug kadasig.

Wala madugay, samtang anaa sa gawas si Amanda dihang nadungog niyang misinggit ang iyang mga anak sulod sa iyang balay. Midalidali siyag sulod sa balay ug nakita si Alma nga nagdagandagan sa kuwarto. "Ayo na ko, Ma, Ayo na ko!" miingon siya. Pagkahuman, mibiya si Amanda ug ang iyang mga anak sa Hawn's Mill.

(Gikutlo ug mubo nga gipagpasabot gikan sa *Mga Santos*, 1:394–398, 401–04, 430–431)